

Tahi ya boleng ba R15m e sa kgafiswang e kgutliseditswe mmarakeng hape

Tshwane, 7 Loetse 2021 – Ditshebeletso tsa Lekgetho tsa Afrika Borwa le Ditshebeletso tsa Sepolesa sa Afrika Borwa (SAPS) ka tshehetso ya indasteri ya tahi, ba utullutse polokelo mane Mpumalanga moo tahi e sa kgafiswang ya boleng ba R15-million e ntseng e kgutlisetswa mmarakeng hape.

Ke makase a fetang 12 700 a tahi e sa kgafiswang a fumanweng mapatlelong le a ileng a haptjwa ka mora diphuputso tse nkileng selemo.

Bahlanka ba SARS le SAPS ba bile ba fumana disebediswa tse neng di sebediswa ho fetola dihlahiswa tsa sethatho. Mabotlolo le mabokose ao tahi ena e neng e kentswe ka hara ona a na le dileibole tse bontshang hore sehlahiswa ha se kgafiswe mme ka hona se lebile mmarakeng wa boditjhaba.

Le ha ho le jwalo, dimokolara tsa dihlahiswa tsena di ile tsa tlosa dileibole tsena mabotlolong ana mme ka dinako tse ding ba fetola le dikwahelana tsa tsona le ho tlosa dikhoutu tsa lenane la tsona mabokoseng.

Khomishenara ya SARS Edward Kieswetter o boletse hore tahi e seng molaong e nonyeta indasteri ya lehae ka nako eo dithibelo tsa Covid le tsona di nang le kgahlamelo e matla indastering ena.

“Ketso e tjena ya bonokwane e ke ke ya mamellwa mme re tla shebana le yona mme bohle ba nang le seabo ho marangrang ana a ho mokola ba tla tshwarwa. SARS e na le thomo ya ho lwantshana le kgwebisano e seng molaong mme ho totobetse hore diketsahalo tse jwalo ha di molaong mme di baka tlhodisano e leeme indastering ena ya lehae.

"Re ikemiseditse ho thafalletsa le ho etsa hore ditjeo e be tse hodimo bakeng sa molefalekgetho kapa mohwebi ofe kapa ofe ya sa ikobeleng tefo ya lekgetho kapa boitlamo ba hae ba tsa bolaodi ba meedi ba naha ena. Kahoo, ke batla ho ananela le ho leboha bafuputsi bakeng sa boikitlaetso ba bona le ho latella ha bona tabeng ena."

Ho fumana lesedi le fetang lena, ikopanye le SarsMedia@sars.gov.za